

Eerste vliegtuig ooit land gou op St. Helena

Erika Gibson

PRETORIA. – Dit was tot onlangs bekend as een van die mees afgeleë gebiede ter wêreld, maar vandeeweek land die eerste vliegtuig ooit op St. Helena-eiland – mits die weer saamspeel.

'n Suid-Afrikaanse KingAir-vliegtuig het dié geskiedkundige vlug gisteroggend van die Lanseria-lughawe aangepak.

Die bemanning en vliegtuig sou teen gistermiddag op Ondangwa in Namibië aangekom het, van waar hy vandag tot by die Angolese weskus sal vlieg.

Dan volg ses uur oor die see tot by die eiland 1 950 km wes van Suid-Afrika waar die vliegtuig die stelsels van die lughawe wat by Prosperous Bay gebou word, sal help toets.

Die eiland was vir dekades slegs met 'n posboot en handelskepe met die buitewêreld verbind. Baie

van die families op die eiland het selde of ooit kontak met hul nassate in Suid-Afrika gehad.

Napoleon Bonaparte is in 1815 soontoe verban en is ses jaar later op die eiland begrawe. Ook Dinuzulu kaCetshwayo, die Zoeloeheerser wat sy impi's teen die Britse heersers in Suid-Afrika gemobiliseer het, is daar aangehou.

Tydens die Anglo-Boereoorlog is sowat 5 000 oudstryders ook na dié eiland, wat steeds as 'n buitelandse “kolonie” van Brittanje bestuur word, verban en daar aangehou.

Die eiland het sedertdien die fokuspunt geword vir verskeie bewarings- en navorsingsprojekte, terwyl die nagenoeg 5 000 inwoners die infrastruktuur op die eiland help ontwikkel het.

Die Suid-Afrikaanse konstruksimaatskappy Basil Read bou die lughawe. Volgens die webblad sainthelenaaccess.com is die ont-



Dié KingAir-vliegtuig het gister die lang tog na St. Helena-eiland-van Lanseria af aangepak.

Foto: ADRIAN MUNRO

wikkeling 'n goeie Suid-Afrikaanse storie. Die ontwerp van die lughawekompleks het 'n wêreldingenieurstoekenning ontvang. Die meeste van die ingenieurs wat by die projek betrokke is, is Suid-Afrikaners. Hulle doen steeds afrondingswerk aan die kompleks en die lughawe sal na verwagting in November sy internasionale sertifikasie ontvang.

Die Lanseria-lughawe se personeel is deur Basil Read gekontrakteer om te help met die indiens-

stelling van die lughawebeheerstelsels. Die eerste kommersiële vlugte van Comair begin teen einde Februarie volgende jaar.

Die eiland se webblad het die eerste vlug vandeeweek met groot fanfare aangekondig. Honderde mense word by die lughawe verwag om deel te wees van die begin van 'n nuwe era op die eiland.

Die bouwerk by die lughawe het ook 'n toevoerpad van 14 km na die res van die eiland ingesluit.

Vandeeweek gaan die vyf polisiemane op die eiland, waar daar laas in 1974 'n moord gepleeg is, ingespan word om die “skares” met die aankoms van die vliegtuig te help beheer. Volgens die webblad gaan die lughawe en die gereelde vlugte vir die eerste keer geleentheid vir die eilandbewoners bied om ekonomies lewensvatbare projekte te begin.

■ **Nog 'n foto op bl. 2.**